

«Ձեռներեցներ առողջապահության ոլորտում» ծրագրի Դրույթներ և պայմաններ

Տեղեկատվական թերթիկ դիմորդի համար

Վերջին թարմացումը՝ 2020թ. դեկտեմբերի 14

«Ձեռներեցներ առողջապահության ոլորտում» (ՁԱՌ) ծրագիրն իրականացվում է Հայաստանի ամերիկյան համալսարանի Թրփանճեան Հանրային առողջապահության ֆակուլտետի կողմից՝ «Թրփանճեան գյուղական համայնքների զարգացման» ծրագրի (ԹԳՀԶԾ) հետ համագործակցության արդյունքում: Այն նպատակ ունի օգնել առողջապահության ոլորտի ձեռներեցներին հիմնել կամ ընդլայնել իրենց մասնավոր գործունեությունը՝ այդպիսով բարձրացնելով որակյալ ծառայությունների հասանելիությունը Հայաստանի, Արցախի և Ջավախքի մարզային փոքր քաղաքներում և գյուղական համայնքներում՝ կիրառելով ժամանակակից տեխնոլոգիաներ և նորարարական մոտեցում:

Դիմելու ընթացակարգը

ՁԱՌ ծրագրին կարող են դիմել ինչպես առողջապահության ոլորտի մասնագետները (բժիշկներ, կլինիկական օրդինատորայի ուսանողներ, առողջապահական ոլորտի այլ աշխատակիցներ), այնպես էլ անհատները, ովքեր առողջապահության ոլորտում կրթություն չունեն, սակայն մատուցում են կամ ցանկանում են մատուցել առողջապահական ծառայություններ:

ՁԱՌ ծրագրին դիմելու համար անհրաժեշտ է լրացնել դիմում-հայտի էլեկտրոնային կամ տպագիր տարբերակը և հանձնել ՁԱՌ ծրագրի Երևանի կամ ԹԳՀԶԾ մարզային ցանկացած գրասենյակ: Լրացված հայտը հնարավոր է նաև հանձնել էլեկտրոնային նամակով՝ ուղարկելով այն eih.trdp@aua.am էլեկտրոնային հասցեին (դիմում-հայտի էլեկտրոնային տարբերակները, ինչպես նաև ծրագրի աշխատակիցների

կոնտակտային տվյալները հասանելի են <http://eih-trdp.aua.am> կայքում):

Դիմումի մեջ դիմորդը պետք է նկարագրի առաջարկվող ծառայության տեսակը, ընտրված տարածաշրջանը, հիմնավորի առաջարկված ծառայության անհրաժեշտությունը տվյալ տարածաշրջանի համար, և ներկայացնի, թե արդյո՞ք ցանկություն ունի ՁԱՌ ծրագրի աջակցությամբ անհրաժեշտ փուլերն անցնելուց հետո ստանալ ցածր տոկոսադրույքով (6%) վարկ, և եթե այո, նշի նաև իր գաղափարի իրականացման համար ՁԱՌ ծրագրից ակնկալվող գումարի չափը:

Դիմորդի մասնակցությունը ՁԱՌ ծրագրին հիմնված է դիմորդի բիզնես-գաղափարի իրատեսականության և ՁԱՌ ծրագրի նպատակներին համապատասխանության, պահանջված գումարի չափաքանակի և ընտրված տարածաշրջանում առաջարկված ծառայությունների կարիքի գնահատման, դասընթացներին պարտաճանաչ մասնակցության և դրանց մեջ ակտիվ ներգրավվածության, ինչպես նաև (վարկին հավակնելու դեպքում) դիմորդի վարկային պատմության հիման վրա:

Կարևոր է՝

- ՁԱՌ ծրագիրն իրավունք ունի պահանջել որոշակի նախապայմաններ՝ դիմումը ընդունելու համար (օրինակ՝ տրամադրել նախնական շինության լուսանկարներ):
- ՁԱՌ ծրագիրն իրավունք ունի դիմորդից պահանջել անձնական տվյալներ և փաստաթղթեր:
- ՁԱՌ ծրագիրն իրավունք ունի դիմորդից պահանջել իր վարկային պատմության մասին պաշտոնական տվյալներ (ACRA report):
- ՁԱՌ ծրագիրն իրավունք ունի այցելել առաջարկված ծառայության մատուցման նախնական տարածք, զննել այն, և լուսանկարել:
- ՁԱՌ ծրագիրն իրավունք ունի կասեցնել դիմորդի հետագա մասնակցությունը ծրագրում՝ վերջինիս կողմից ծրագրի աշխատակիցների կամ այլ մասնակիցների նկատմամբ ոչ պատշաճ վարվեցողության կամ անհարգալից բերաբերմունքի դեպքում:
- ՁԱՌ ծրագիրը պարտավորվում է պահել դիմորդի կողմից տրամադրված ամբողջ տեղեկատվության գաղտնիությունը և տրամադրել դրանք ցանկացած երրորդ կողմի՝ միայն դիմորդի համաձայնությունը ստանալուց հետո:

- Դիմորդն իրավունք ունի տեղեկատվություն պահանջել իր դիմումի կարգավիճակի մասին՝ դիմումի հանձնման օրվան հաջորդող ամբողջ ժամանակահատվածում:
- Դիմումի մերժման դեպքում դիմորդն իրավունք ունի պահաջել դիմումի մերժման պատճառը:

ՁԱՌ ծրագրի կողմից ապագա շահառուներին տրամադրվող անվճար դասընթացները

Դիմումի ընդունումից հետո ՁԱՌ ծրագրի շահառու դառնալու համար դիմորդը պարտադիր կերպով պետք է մասնակցի և հաջողությամբ ավարտի «Ձեռնարկատիրական հմտություններ», «Բուժօգնության որակի կառավարման հիմունքներ», « Հաշվապահական հաշվառում առողջապահության ոլորտում» և, եթե դիմորդը ցանկանում է մատուցել ատամնաբուժական ծառայություններ, նաև «Կանխարգելիչ ատամնաբուժություն» դասընթացները:

Նշված բոլոր դասընթացներն անվճար են, իրականացվում են միայն ՁԱՌ ծրագրի դիմորդների համար, հայերեն լեզվով են և, բացառությամբ «Ձեռնարկատիրական հմտություններ» դասընթացի, անցկացվում են միայն ք. Երևանում, Հայաստանի ամերիկյան համալսարանում: 2020-21 թթ.-ին դասընթացներն իրականացվում են օնլայն՝ տեսահանդիպումների միջոցով:

Կարևոր է՝

Մասնակցության վկայական, ինչպես նաև ՁԱՌ ծրագրին մասնակցությունը շարունակելու նախապայմանն է բոլոր դասընթացների ընդհանուր ժամաքանակի առնվազն 80%-ի մասնակցությունը:

Դասընթացների ընդհանուր ժամաքանակի մինչև 30%-ի *հարգելի* բացակայության դեպքում, դասընթացավարի համաձայնությամբ, հնարավոր է լրացնել բաց թողնված դասաժամերը դասընթացից դուրս՝ դեմ առ դեմ հանդիպման կամ տեսահաղորդակցման միջոցով:

«Բուժօգնության որակի կառավարման հիմունքներ» և «Կանխարգելիչ ատամնաբուժություն» դասընթացներն ավարտելուց հետո ՀՀ

Առողջապահության նախարարության կողմից հաստատված ՇՄՁ (շարունակական մասնագիտական զարգացման) կրեդիտներ ստանալու նախապայմանը դասընթացի տևողության 90%-ի մասնակցությունն է:

«Ձեռնարկատիրական հմտություններ» դասընթացի ընդհանուր տևողությունը 60 ժամ է:

«Ձեռնարկատիրական հմտություններ» դասընթացը նույնն է ինչպես ՁԱՌ, այնպես էլ ԹԳՀԶՕ դիմորդների համար, ուստի ՁԱՌ դիմորդները կարող են անցնել տվյալ դասընթացը նաև ԹԳՀԶՕ այն մարզային գրասենյակներում, որոնք մոտ են դիմորդի բնակության վայրին և ունեն ազատ տեղեր դասընթացի համար: ԹԳՀԶ ծրագիրը գրասենյակներ ունի ՀՀ Շիրակի (Գյումրի), Վայոց Ձորի (Եղեգնաձոր) և Տավուշի (Իջևան) մարզերում, ինչպես նաև Արցախի Հանրապետությունում (Ստեփանակերտ) և Ջավախեթիում (Նինոծմինդա, Վրաստանի Հանրապետություն):

«Ձեռնարկատիրական հմտություններ» դասընթացի արդյունքում դիմորդը դասընթացավարի և նրա օգնականի օգնությամբ կազմում է Բիզնես-ծրագիր, որը, դասընթացավարի կողմից հաստատվելուց հետո, մասնակցի կողմից ներկայացվում է փորձագետների խորհրդին՝ շնորհանդեսի (պրեզենտացիա) տեսքով, և հետագայում անցնում է մի քանի փուլ, որտեղ տարբեր մասնագետներ մեկնաբանություններ և խորհուրդներ են տալիս մասնակցին՝ Բիզնես-ծրագիրն ուժեղացնելու հարցում, որոնց հիման վրա էլ մասնակիցը պետք է վերջնականացնի իր Բիզնես-ծրագիրը՝ մշտապես աշխատելով դասընթացավարի և ՁԱՌ մարզային գործունեությունը համակարգողի հետ:

Կարևոր է՝

ՁԱՌ մասնակցի Բիզնես-ծրագիրը ներկայացվում է ՁԱՌ գործադիր կոմիտեին ***միայն*** նրա կողմից «Բուժօգնության որակի կառավարման հիմունքներ» դասընթացը հաջողությամբ ավարտելու, և վերջնական Որակի ապահովման ծրագիրը հանձնելու պարագայում:

Երկու ծրագրերը միասին ՁԱՌ գործադիր կոմիտեին ներկայացվելուց հետո, դրանք կարող են ընդունվել, չընդունվել, կամ ընդունվել որոշակի փոփոխություններ պահանջելուց հետո (օրինակ՝ գումարի չափի փոփոխություն, Որակի ապահովման ծրագրի ցուցանիշների փոփոխություն, և այլ):

«Բուժօգնության որակի կառավարման հիմունքներ» դասընթացի ընդհանուր տևողությունը մոտ 42 ժամ է:

«Բուժօգնության որակի կառավարման հիմունքներ» դասընթացի ընթացքում յուրաքանչյուր դիմորդին կցվում է 1 խորհրդատու (առողջապահության ոլորտում մասնագետ):

Դասընթացի արդյունքում դիմորդը դասընթացավարի և խորհրդատուի «հսկողությամբ» և օգնությամբ կազմում է Որակի ապահովման ծրագիր, որը դասընթացավարի կողմից հաստատվելուց հետո մասնակցի կողմից ներկայացվում է փորձագետների խորհրդին՝ շնորհանդեսի (պրեզենտացիա) տեսքով: Որակի ապահովման ծրագրերը գնահատող փորձագետներն են ՀԱՀ Թրփանճեան Հանրային առողջապահության ֆակուլտետի դասախոսներն ու գիտաշխատողները:

Կարևոր է՝

Եթե Բիզնես-ծրագիրը և Որակի ապահովման ծրագիրը վերջնականապես ընդունվում են ՁԱՌ գործադիր կոմիտեի կողմից, ապա վարկը վերջնականապես հաստատող կառույցը **ՁԱՌ համագործակցող բանկն է:** Եթե դիմորդը հավակնում է վարկին, նա ՁԱՌ մարզային գործունեությունը համակարգողի հետ միասին հավաքագրում է վարկի համար անհրաժեշտ բոլոր փաստաթղթերի փաթեթը և ներկայացնում բանկին: Բանկի կողմից դրական պատասխան ստանալուց հետո, դիմորդը ստանում է հաստատված գումարի չափով վարկը՝ 1 կամ ավելի մասնաբաժիններով: Ինչպես առաջին, այնպես էլ յուրաքանչյուր հաջորդ մասնաբաժնի տրամադրման համար ՁԱՌ ծրագիրն իրավունք ունի պահանջել որոշակի պայմանների առկայություն (օրինակ՝ անձնական ռեսուրսներն օգտագործելով ներքին հարդարման աշխատանքներ՝ մինչև վարկի առաջին մասնաբաժնի տրամադրումը, կամ առաջին մասնաբաժնով գնված սարքավորումների առկայություն և գնման անդորագրեր՝ մինչև երկրորդ մասնաբաժնի տրամադրումը):

«Առողջապահական հաշվապահություն» դասընթացի ընդհանուր տևողությունը 18 ժամ է:

«Կանխարգելիչ ատամնաբուժություն» դասընթացի տևողությունը 7 ժամ է: Այն պարտադիր դասընթաց է միայն ՁԱՌ ծրագրի այն մասնակիցների համար, ովքեր մատուցում են, կամ ցանկանում են մատուցել ատամնաբուժական ծառայություններ:

ՁԱՌ ծրագրի դիմորդները դառնում է նույն ծրագրի շահառու՝ նրանց կողմից կազմված Բիզնես-ծրագրի և Որակի ապահովման ծրագրի՝ ՁԱՌ գործադիր կոմիտեի կողմից հաստատումից հետո:

ՁԱՌ ծրագրի շահառուները կարող են օգտվել ցածր տոկոսադրույքով վարկ ստանալու, շարունակական մասնագիտական խորհրդատվության, ինչպես նաև սփյուռքում բնակվող և աշխատող հայ բժիշկների հետ համագործակցության հնարավորություններից և շատ այլ: